

গান

যে কেহ মোরে বেসেচ ভালো
জ্বলেচ ঘরে তাঁহারি আলো,
তাঁহারি মাঝে সবারি আজি
পেয়েচি আমি পরিচয়,
সবারে আমি নমি ॥

যা কিছু কাছে এসেচে, আছে,
এনেচে তাঁরে প্রাণে,
সবারে আমি নমি ।

যা কিছু দূরে গিয়েচে ছেড়ে,
টেনেচে তাঁরি পানে,
সবারে আমি নমি ।

জানি বা আমি নাহি বা জানি,
মানি বা আমি নাহি বা মানি,
নয়ন মেলি নিখিলে আমি
পেয়েচি তাঁরি পরিচয়,
সবারে আমি নমি ॥

গরব মম হরেচ প্রভু দিয়েচ বহু লাজ ।
কেমনে মুখ সমুখে তব তুলিব আমি আজ
তোমারে আমি পেয়েচি বলি
মনে মনে যে মনেরে চলি,

পড়িনু ধরা, সংসারেতে
করিতে তব কাজ—
কেমনে মুখ সমুখে তব
তুলিব আমি আজ ॥

জানিনে নাথ, আমার ঘরে
ঠাঁই কোথা যে তোমারি তরে,
নিজেরে তব চরণপরে
সঁপিনি রাজরাজ ।
তোমারে চেয়ে দিবস যামী
তোমারি পানে তাকাই আমি,
তোমারে চোখে দেখিনে স্বামী
তব মহিমা মাঝ,—
কেমনে মুখ সমুখে তব
তুলিব আমি আজ ॥

সবার মাঝারে তোমারে স্বীকার করিব হে ।
সবার মাঝারে তোমারে হৃদয়ে বরিব হে ॥
শুধু আপনার মনে নয়,
আপন ঘরের কোণে নয়,